



大方廣佛華嚴經入法界品四十二字觀門

爾時善財童子從天宮下。向迦毘羅城。至善知眾藝童子所。
頭頂禮敬於一面立。白言聖者。我已發阿耨多羅三藐三菩提心。
而未知菩薩云何學菩薩行。云何修菩薩道。我聞聖者善能教誨。
願為我說。時彼童子告善財言。善男子我得菩薩解脫。名善知眾藝。
我恒稱持入此解脫根本之字。

- 𑖀 阿(上)字時名由菩薩威德入無差別境界般若波羅蜜門。悟一切法本不生故。
- 𑖡 囉字時。入無邊際差別般若波羅蜜門。悟一切法離塵垢故。
- 𑖢 跛字時。入法界際般若波羅蜜門。悟一切法勝義諦不可得故。
- 𑖣 左(輕呼)字時入普輪斷差別般若波羅蜜門。悟一切法無諸行故。
- 𑖤 曩(舌頭呼)字時。入無阿賴耶際般若波羅蜜門。悟一切法性相不可得故。
- 𑖥 擲字時。入無垢般若波羅蜜門。悟一切法出世間故。愛支因緣永不現故。
- 𑖦 娜字時。入不退轉加行般若波羅蜜門。悟一切法調伏寂靜真如平等無分別故。
- 𑖧 麼字時。入金剛場般若波羅蜜門悟一切法離縛解故。
- 𑖨 拏(上)字時。入普遍輪般若波羅蜜門。悟一切法離熱矯穢得清涼故。
- 𑖩 灑字時。入海藏般若波羅蜜門。悟一切法無罣礙故。
- 𑖪 嘯字時。入普遍生安住般若波羅蜜門。悟一切法言語道斷故。
- 𑖫 多(上)字時。入照曜塵垢般若波羅蜜門。悟一切法真如不動故。
- 𑖬 野字時。入差別積聚般若波羅蜜門。悟一切法如實不生故。
- 𑖭 瑟吒(二合上)字時。入普遍光明息除熱惱般若波羅蜜門。悟一切法制伏任持相不可得故。
- 𑖮 迦(上)字時。入差別種類般若波羅蜜門。悟一切法作者不可得故。
- 𑖯 娑(上)字時。入現前降雲大雨般若波羅蜜門。悟一切法時平等性不可得故。

